



UNIVERSITÄTS-
BIBLIOTHEK
PADERBORN

Rei Christianae Apvd Iaponios Commentarivs

Trigault, Nicolas

Avgvstae Vindelicorvm, 1615

Ad superiorem rerum Iaponensium Commentarium. Appendix.

[urn:nbn:de:hbz:466:1-68745](#)

*Ad superiorem rerum Iaponen-
sium Commentarium*

APPENDIX.

His triennij superioris commentarijs libet attexere recentissimas è Iaponia litteras, quibus anni in sequentis res geste, duodecimi videlicet supra sexcentesimum perstringuntur. nondum enim confecto anno, & quod inde sequitur, nondum scriptis annalibus, mense Octobri soluebat è Iaponia in Macaensem Sinarum portum, prima nauigandi per illa maria tempestate nauigiū. Visum est ergo eius Ecclesiæ Præsuli, & societatis superioribus, res gestas in compendiū contrahere, & ad R. P. Nostrum destinare, si qua sese fortassis occasio in Europa offerret. Annales interim suo tempori reseruarunt, qui cum ante ultimum nauigium, quod anno 1613. in Indiam soluebat mense Februario, nondum appulisset, Ego qui eo nauigio vehebar hoc Iaponicorum annalium compendium accepi Romam deferendum, & interim dum nauigando vacuos dies inueni, è Lusitano sermone in Latinum quoque transtuli, nihil veritus futuris annalibus suam nouitatem decerpere, satisq; certus, ex hoc summario sitim, non fastidium, nascituram: nam tametsi res sunt omnino luctuosæ, tamen habent, nescio quam, su-

Scep

scepti in fidei causa labores suavitatem, & spem certissimam frugis ex Diuina liberalitate nasci solitam abunde promittunt. binæ erant hæ litteræ, ut modo dixi, sed quia idem ita narrant singularæ, ut peculiaria quædam vicissim omittant ac suppleant, visum est mihi ex utrisque unum rei gestæ seriem texere, ne si utrumq; dedero, fastidium repetendo: sin alterum, desiderium omittendo, vitio meo lector accipias. rei ergo gestæ series summatim descripta sic se habet, quæ necessario altius est paulo repetenda. Annorum superiorum commentarius res in Iaponia gestas continet in mensem Martium anni 1612.

Præsens item narratio res gestas persequitur in Octobrem usq; anni eiusdem, & quidem res Iaponensis publica nullam sensit mutationem, sed Ecclesiastica res, & quod consequens est nostræ societatis, tantum concussa est, ut alia nulla nec publica magis nec fortasse atrocior tempestas exorta sit, ex quo fides Christiana in has insulas nauigauit. Ea priuato duorum (quod etiam luctuosius est) Neophytorum vitio conflata, in universum deinde corpus penetrauit.

Notior est Ioannes Arimadonus Arimensis Dynasta, annalium Iaponiensium lectoribus, quam ut opus sit eum velle facere notiorem. Is educationis suæ è Christiano instituto peractæ immemor, ditionis suæ fines extendi maximè ambiebat, & quidem regni Fyensis portionem,

mai-

maioribus suis erectam, Ta cacuano agro Amensique regno rursum adiungere cupiebat. Sub idem ferè tempus, à summo Iaponensis imperij moderatore, proneptis ei offertur, quam primogenito suo Michaeli, vxorem daret. ac tametsi filius iam Christiano ritu coniugem accepisset, apud eum tamen effecit dominandi libido, ne oblatum sibi honorem, & rei benererendæ occasionem prætermitteret. Michael igitur Parente nihilo melior, per summum sce-lus, priori coniugem aliam, verius pellicem super induxit. Et id vterq; egit, vt Patres prius rem factam viderint, quam futuram subodora-fentur, quam tamen ut maxime præuidissent impedire minime potuissent, tantum apud ho-mines valet dominandi cupiditas. Hac noua affinitate auctus Ioannes acrius cœpit de profundiis regni finibus cogitare, degebat in Imperatoris aula Neophytus quidam Paulus Daifachi nomine, Ioanni peramicus & idem à Secretis erat. Cozuquedoni viri mobilissimi penes quem, ut erat imperatori gratus in primis, primaria regni negotia sed maxime regnorum distributio pro cuiusque debitibus versabatur. hoc maximè adiutore nitebatur Ioannes, ab Imperatore Fyensis regni partem obtainere, eam in rem nulli sumptui parcens, ad profusas largitiones Pauli arbitrio distri-buendas, quam plurima donaria submittebat.

Paulus

Paulus vero mala fide negotium gerens Ioannem in aui spe lactabat , eoque res deuenit , vt ad Ioannem Regij diplomatis exemplum mitteat , quo regni Fyensis , portionem sese impetrasse mentiebatur , nisi fortasse , quod Paulus asserebat , impetrarat quidem , sed maleuolorum obtrectationibus Imperator ipse à promisso resilierit , eamque in suspicione Nangasaquiensis oppidi Gubernator Sasioie dictus , idem & Christiani nominis publice & priuatim Arimensis Dynastæ hostis , à Paulo vocabatur . quam ob causam non inimicitiae solùm inter vtrumque capitales erant , sed etiam de Sasioie nece consilia inter Paulum ac Ioannem secretò miscebantur . Sesquianum iam tenuerat nullo euentu Fyense negotium , ac licet Paulus de tota re minime desperandum esse scribebat , Ioannes tamen ne tot sumpus nullo fructu fecisse videretur , maxime quod iam res euulgata crederetur ; statuit sibi ad urbem regiam proficendum , vt rem totam præsens inspereret , & è proximo procuraret . comitabantur Michael filius . & noua nupta Imperatoris proneptis , eo consilio quod sibi quisque proponebat : Ioannes noster è nuru fauitem sperabat ; Michael vero vna cum pellece sua alia omnia meditabatur , indigna , non homine solùm Christiano , in proximum .
sed

Sed etiam filio in parentem. Solent Iapones cum ad senectutem inclinant filijs iam coniugio astrictis regnorum suorum ac ditionum administrationem resignare, & sese in villam aliquam recipere. Eum morem negligebat Ioannes, Michaeli vero potissimum nouæ nuptæ consilijs incitato, sera iam videbatur dominandi astas. ad hæc inter parentem ac filium domesticæ rixæ aliquot intercesserant, quibus animi exasperati fuerant, tametsi alte omnia magna dissimulatione tegebant. Ergo Michael minimè negligendam exturbandi è solio parentis sequē intrudendi occasionem ratus, in aulam cum parente ibat nouæ nuptæ gratiâ innixus.

Vbi in urbem Fuximi peruentum est communis consilio præmissus est Michael cum coniuge, & hæc à parente in mandatis accepit, ut diligentí opera disceret ex Panlo Dayfachi, quid causæ esset, cur Fyense negotium tanto tempore spem falleret; qui si minus apposítè responderet, moneretur Cosuquedonus Pauli herus, de tota re & apud eū quæreretur Michael, quā mala fide Paulus hactenus rem gessisset, quantas largitiones profudisset, aut ipse deuorasset, simul exemplum ostenderet Regij diplomatis à Paulo sibi pridem transmissum quod fictum esse suspicaretur. fecit Michael quod erat iussus eò accuratius, quod etia ad res suas bene gerendas attinebat Parentem intricare. Paulus igitur quis

quia causæ suæ diffidebat, nihil est veritus omnia pernegare, ratus fortasse litteras suas excidisse, neque se facile posse conuinci. Itaque Michael Cosuquedonum adit, Paulum accusat, litteras ostendit, Et regij diplomatis exemplum, quo Fyensis regni portionem inipetratam mentionebatur, profert. Is rem, uti sibi nouam, admiratur, Paulum gratiter incusat, & contra eum opem suam pollicetur, hactenus ea res aut nemini, aut paucis nota erat, sed imposterum tota aula euulgata est, & facile ad ipsius Imperatoris aures, vel Cosuquedoni opera, vel domesticis proneptis querelis, quæ omnia domi contra sacerum miscebat: questa se ab Arimensi Dynasta socero suo, neq; pro dignitate exceptam, nec postea habitam, maritum suum imperatoria iam affinitate inclitū, præter Iaponia morem etiam in priuatū degere, parentem vero illius, non solū sua æquo tenacius retinere, sed etiam Fyensis regni partē malis artibus ambire.

Imperatori ea res non ferenda visa est. Paulum igitur comprehendit, & Ioannetū in urbem regiam (Surunga nomen est) exemplo euocari iubet: causæ vero cognitionem supremo Iaponiæ Senatui committit, ubi aduenit Ioannes Paulum acriter accusat, quem multa licet tergiuersantem, litteræ signa manus clarissimè convicerunt, ergo amicitia in odium versa, Paulus quoque Ioannem de varijs insimulat & arcana

S

cius

eius consilia aperit, maximè verò Saffoie nē
cem intentatam, qui tum in aula fortè aderat,
& in eo ipso tribunalī confidebat. Paulus ergo
à iudicibus latro, & dolo malo rem alienam e-
gisse pronunciatus: Ioannes multa perperam
egisse est insimulatus; pæna in vtrumque ab
Imperatore, Ignis in Paulm, in Ioannem ex-
ilij proclamata; Paulus igitur tota vrbe igno-
miniosissimè circumiectus in destinato suppli-
cijs loco, viuus igne lento tostus est; quo in sup-
plicio fortiter se & Christianē gessit. Nam
cum ab amico Ethnico suaderetur, ut ventrem
sibi ipsi dissecaret, vt ignominiam simul & sup-
plicij atrocitatē declinaret, laudem ex Ja-
ponico more, pro morte sibi fortiter illata con-
secuturus, id omnino facere recusauit, quod
Christianis legibus violentas sibi manus infer-
re vetaretur, se verò supplicij vel ignomini-
am, vel atrocitatē, velut sceleribus suis debi-
tam minimè refugere, & è diuina manu acce-
ptare: quod responsum stupore amicum
affecit, professum veram animi magnitudi-
nem in Christianis institutis reperiri. ad ob-
eundam quoque Christiana cum pietate mor-
tem, non parum adiuvit, quoniam alia sub-
sidia excludebantur, coniugis præsentia, quam
etiam Imperator vna cum marito perire iusse-
rat, sed vita demum illi condonata, inter-
cessione pellicis regiæ; iussa est tamen tristi-
specta-

spectaculo interesse, qua in re Christianæ virginis animum præ se tulit, & marito hortatrix fuit ad mortem Christianæ obeundam.

Ad eum modum extictus est Paulus, nunc Ioannem in exilium proficiscentem prosequamur. Exutus regno primum eoque donatus Michael, opera maximè coniugis fuit. Proscriptus autem in regno Caynocuni exulare iussus, vna cum Iusta coniuge matrona sanctissima & paucis famulis, abest hoc regnum ab Arimensi longissimè, à Surunga verò non procul. In hūc exilio locum se contulit ipso dominicæ resurrectionis die, iusto quidem Dei iudicio, ut ei qui Ecclesiasticas leges violarat, Ecclesiasticæ quoque festiuitates in tristitiam verterentur. Hanc tamen rerum mutationem forti animo tulit, professus sceleribus suis debitas pœnas ab offenso Numinere repeti. Verùm vt erat animo nō nihil inquieto, & parum aduersæ fortunæ patientis, cum sensisset hæc sibi à proprio filio infortunia, nurnque simul cum Safioie hoste suo capitalissimo coniuratis, esse procuratas, tentare iam in exilio positus cepit, si qua via se posset eripere, & in pristinum statum restituere. Scribebat frequentes in aulam litteras, ijs destinatas, quos gratia sciebat apud Imperatorem, & apud cæteros auctoritate pollere. Auditum est hoc ab æmulis quos dixi, cum iam ex aula

digressi redirent in occiduas Iaponiæ regiones. statuerunt igitur hūc sibi necessario eripiendum metum, virum nouerant facundum esse ac solerterem, cumque intelligerent posse fortasse ingrādum pristinum reuocari, in aulam tres viros mittunt, qui proscripto mortem machinentur; tanta vis est in regnandi cupiditate, ut ex animis euellat, quod natura mortalibus impressit; ipsi verò in itinere interim substiterunt, dum rei euentum præstolantur. Qui missi fuerant, tum alia multa de Ioanne questi, tum maximè intentatam Safioje necem clarius explicantes, effecerunt, ut capit is in exulem sententia pronunciaretur. ergo quinto & quadragesimo die postquam in exilium fuerat deportatus, nonis Iunij capite plectitur. Tristem nuncium Extremumque supplicium, ea animi comparatione scelerumque suorum detestatione ita suscepit, facile, ut ostenderit iratam vindicis manum, multum paterna clementia mitigatam. Neque enim decebat tam indigna Christianæ professionis crimina, impune ad Ecclesiæ Iaponensis exemplum abire; sed neque Diuinam bonitatem decebat eum planè defrerere, à quo tot in Christianam legem merita, dum saniori mente esset, profecta sciebantur.

Ex hoc euentu sane tragico, tempestas orta est, cuius causa narratio superior est instituta; quanquam aliunde quoque prouenisse credibile

leest. Nam cum Insularum Philippinarum Pro-
rex Nauarcho cuidam Hispano demandasset,
vti plagam Iaponiæ, quæ ad Austrum vergit ac-
curatè describeret; & portus immissa bolide ex-
ploraret, idque factnm fuisse, etiam cum Im-
peratoris facultate, tamen ex ijs Hollandis v-
nus, qui in hoc regno versabatur, eum deinde
monuit, eam rem apud Europæos insolitam
belli signum esse, neque tolerari solere. Et hic
tam à Principis sui quam Ecclesiæ Catholicæ
desertor auxit suspicionem ex eo, quod Nauar-
cho perpetuus comes fuerat è D. Francisci fami-
lia Religiosus, renouans antiquorem illam su-
spicionem anni 1596. in casu non absimili, de
quo iam P. V. scriptum fuisse meminimus. Ea
igitur littoris lustratio in regno Yendo maximè
facta est, quo in regno totius Iaponiæ futurus
heres sedem figit. vnde non ille minus, quam
eius parens rem grauatè tulisse scribuntur, & sa-
nè prius, quam in aula Surungana, controuersia
illa inter Paulum ac Ioannem euulgaretur, à
Principe publicatum fuerat edictum (non sine
parentis auctoritate) ne illo in regno nobilis
quispiam Christiana sacra susciperet, grauibus
pœnis illi præpositis, qui mandatum neglexis-
set. Quin etiam prius in eius aula, de Christia-
nis omnibus extinguendis inita consilia fere-
bantur. Verùm nec edictum nec alia consilia
ad id temporis ullum effectū sortiebantur.

S 3

Quæcunq;

Quæcunque verò tandem fuerit persecutio-
nis causa, utramque fuisse nihil dubium est, e-
go narrationem pergo prosequi, & primum
quid Imperator, deinde quid reliqui reguli, ad
extremum quid Michael in religionem Chri-
stianam mouerit commemorabo. Ex infaustæ
litis eveatu inter duos Christianæ religionis
professores, magnam ipsa religio, licet inime-
rito, contraxit infamiam. Nam summus to-
tius Iaponiæ Imperator, ut iam diu non parum
infensus fidei Christianæ institutis, hinc an-
sam capiens obrectandi, duorum culpam in-
vniuersos, & inde in ipsam legem Christianam
referebat, palam dictans, aliam sectam non
esse ullam quæ huic dolis, fraudibus, impieta-
te par foret, ergo acriter in domesticos suos in-
quiri iuberet, essente aliqui huius, ut aiebat im-
pietatis sectatores. Delati sunt omnino qua-
tuordecim, quibus ad se euocatis admodum si-
bi displicere præ se tulit; quod neglecto edi-
cto suo, (quo iam olim interdixerat, ne cui li-
ceret è familia sua patrios ritus cum peregrinis
Christianorum institutis commutare) ad im-
piam sectam defecissent, qua ex causa merito
capitalis criminis rei essent, se tamen præte-
ritis obsequijs vitam dare, & fædam à pa-
trijs Dijs defectionem, bonorum proscrip-
tione & perpetuo exilio damnare; quam sen-

*prædicti incolis incolis nulli anquam tentiam
adibitum*

tentiam Christi Athletæ fortissimi ad vnum omnes cæperunt. Sed crudelissimus tyrannus atrocius propè sœuijt in absentes. Nam à supremo Imperij Senatu suo nomine litteras ad vniuersos regulos scribi iussit. Interdixisse se vniuersis aulæ suæ asseclis, ne quis patrios ritus cum impia Christianorum, secta com-mutaret. Et quoniam ex omni suo comita-tu quatuordecim deprehensi fuerant, qui hanc suam voluntatem sequi neglexissent, eos se fortunis omnibus ac patrio cælo exuisse. Eos autem cum his litteris nominatim om-nes exprimi voluisset, sanxit seuerissime ne regulorum ac Dynastarum quisquam à se pro-scriptos exciperet, aut quicquam earum re-rum, sine quibus vita duci non potest, sup-peditaret.

Id edictum Iaponensis etiam Ecclesiæ anti-stiti, ac Societatis Iesu superioribus, Nanga-saquiensis oppidi Gubernator ita significauit, ut simul moneret, viderent etiam atque etiam ne hoc edictum violarent, id Imperatorem grauatè laturum, & seuerissimè puniturum. Ita gloriosi Christi pugiles, purgamenta hu-us mundi facti, & in solitudinibus ac spe-luncis errantes, Ecclesiæ nascentis incunabula in extremo terrarum orbe, post tot sœcu-la renouarunt.

Neque hi solum publicum fidei testimonium in amplissimo totius Iaponiae theatro, urbe videlicet regia reddiderunt; nam, cum sit efficiacissimum Principis exemplum in utramque partem, tametsi minimè iussit reliquos aulae suæ Principes, de famulis Christianis, quod ipse fecerat, quæstionem instituere; nihilominus quisque pro se, vel adulandi studio, vel offendendi Principis metu, è suo famulatu plerique fidei Christianæ sectatores expulerunt, iisque ad septingentos numerati dicuntur, & numerosa testimoniū hæc turba, tametsi fidei nostræ constantiam non parum illustrarit, affecit tamen non parum reliquam fidelium turbam & potissimum gregis Christi pastores, cùm videarent tot viros nobiles fortunis omnibus exutos, vna cum suis familijs ad extremam rerum omnium indigentiam esse redactos.

ded neque Regis indignatio sese aulæ finibus tenuit, nam præterquam quòd ædes nobis eræptæ sint, in quibus Sacerdos è nostris, dum Surunganos Neophytorum visiter, morabatur, eo prætextu quod in Pauli, de quo supra, fortunis numerarentur; eandem fortunam subierunt ædes aliae etiam Franciscanorum Patrum, quod vnius è famulis regijs, proscriptione damnatis, esse dicerentur. Imo latius serpsit malum: nam posteaquam in deliberationem ab ipso Imperatore, quid fieret Euangelij præconibus tota Iaponia

ponia sparsis, vocatum fuit, parum absuit quin
sanctaretur, ut omnes nostri quotquot in Cami-
partibus (ita vocant regiones Miacensi metro-
poli viciniores) Miaci omnes cogerentur, neque
inde abire permitterentur. reliqui vero Nan-
gasauij eadem lege retinerentur. Cui senten-
tiæ cum Miacensis Gubernator restitisset, asse-
rens Patres vbiique multos habere suorum dog-
matum sectatores, quos suis temporibus om-
nino essent visitaturi: subintulit Imperator,
eos qui hoc fecerint capite plecti te. Huc illius
euaserat indignatio. neque satis notum qua ra-
tione factum sit, ut mitior sententia lata fuerit:
in extremis quippe Ecclesiæ laborantis angusti-
is, is qui regum corda manu tenet, facit cum
tentatione propentum. Ijs igitur in vrbibus,
quæ ab ipsomet administrantur Imperatore, res
Christianæ in hunc modum est constituta. Miac-
ci, quæ vrbis, est antiquorum Regum Sedes, &
totius in hanc usque diem Iaponiæ caput, au-
toritate regia sanxit, ut una Christianis ædes
sacra dumtaxat relinqueretur, antiqua illa scili-
cet Patrum Societatis nostræ, hac ut appareat ex
causa, quod Regijs diplomatis iam olim minni-
taplus habebat firmitatis. Aliam ædem in infe-
riore vrbis eiusdem statione iussi sunt nostri de-
serere, eamque vel disturbare vel vendere.
Eandem fortunam passa est ædes Patrum è D.
Francisci familia, ipsique iussi sunt è Miacensi

S 5

metro-

metropoli in urbem Fuximi, quæ illis assig-
nata erat demigrare, quod extemplo fuit exe-
cutioni demandatum. De Patribus quoque
Dominicanis quæsijt Gubernator, haberentne
Miaci cænobium & ædem sacram: sed proba-
tum ab ijs est ædes suas esse priuatas, in quibus
Lusitani & Hispani in aulam ventitantes, com-
morarentur. qua ex causa Gubernator noua vl-
tra institit, nisi quod vicinos omnes scripto
confirmare cœpit, rem ita se habere, neque fu-
turos post hac ijs in ædibus vlos Neophyto-
rum cætus; quod etiam seuerè obseruatur. unus
porro alterue, qui è Patribus remanserant oc-
culti, amplius solita munia non exercebant, &
ad extremum ipsi quoque Miaco excedere sunt
coacti. In reliquis vrbibus, quæ in Cami re-
gione computantur, vbi religiosorum Societa-
tis, Diuïque Francisci domicilia visuntur, in
Fuximi seu Vozaca & Sacay, tamen si sint prima-
riò sub Imperatoris ditione, sintque celeberrimi
regni totius emporia, nihil admodum est
immutatum, itaque ibi Euangelij administrari an-
tiquum obtinentes, in hanc usque diem quieti
commorantur, ipsæ tamen ædes connuentibus
Gubernatoribus in amicorum quorundam for-
tunis numerantur. Et Patres tempori seruien-
tes magna circūspectione rem procurant Chri-
stianam. In Vozacensi porro vrbe hoc peculia-
re fuit, q̄ quia est sub Fideyori tutela (is, ut su-

pra

pra dixi, Filius est Imperatoris demortui , ab eo, qui nunc Iaponiæ præest, iniuria exclusus paterna successione) & quia ædes Societatis cum facultate Taicosamæ extructa sit, nihil omnino est innouatum, eandemque immunitatem aliorum Religiosorum, qui in eadem vrbe degunt domicilia senserunt, sed in hac tamen vrbe illustre martyrium sicut Neophyti cuiusdam Leonis, quem priuatim heros ideo mactauit, quod Christianam nollet fidem eiurare, de quo in annuis fusè. Et hæc fere ab Iaponiæ supremo moderatore, vel in aula, vel in vniuersa ditione illi propria, contra rem Christianam in hoc rerum turbine tentata sunt.

Venio nunc ad ea, quæ ad eius exemplum reliqui peculiarium regnum Dynastæ contra Neophytes commouerunt, uno excepto Arimensi Regulo Michaele, cui cōsulto extrellum locum relinquo, quod in eius ditione hæc potissimum procolla sœuerit. Tametsi Iaponensis Imperator ad reliquos Dynastas, nihil super religione Christiana noui scripscerit, nisi quantum ad proscriptos supra famulos attinebat; non paucis tamen vel priuato in Diuinæ legis cultores odio permoti, vel adulandi studio incitati, occasionem inde sumpserunt eos persequendi. Atq; imprimis in Regno Yendo, vbi regni hæres commotatur, edicto novo cautum est,

est, ne cuiquam, è nobilium aut militum ordine liceat Christo summo Imperatori nomen dare, prius autem aliquanto, quām hæc procella oriretur, Patres è Franciscana familia ædes, sacram & priuatam amiserunt, ex eo quod vi-
eus ille in quo sita erat utraque, in fretum recipiendis nauigij s aperiri ceptum, sit auctoritate publica commutatus, non idum porro alium no-
næ structuræ agrum impetrarunt, nec videntur in hac rerum perturbatione impetraturi. In alijs regnis multi, Dynastiarum edictis sollicitati & caducarum rerum amissione percussi, temporis cesserunt; sed alij quoque permulti, quæ Dei benignitas est, insigni constantia, ne religio-
nem amitterent in hac procella, cætera liben-
tes amiserunt, idque maximè in regno, quod Fingo appellatur. Idem ferè de Chicugen di-
ci potest. In Chicungo atrocior etiam fuit tem-
pestas, in ipsum enim Ecclesiæ Pastorem Sacer-
dorem nostrum sauerunt, eum quippe regni
moderatores suis finibus eiecerunt. Qui in vr-
bem Facata se recepit huic regno cōterminam,
vt inde persecutionis exitum contemplaretur,
nec inutile consilium fuit, nam cum illos ipsos
regni moderatores facti pænituisse, ab ijs est
postliminio priori domicilio restitutus, in quo
nunc rem Christianam procurat, sed ita circum-
spectè, vt nihil sua culpa turbarum commoue-
at. In Bungensi regno duabus nostri sedibus
amissis

amissis, Tacæta videlicet & Notcu, ab eius Dynasta abire iussi, quo maximè vellent, se intra eiusdem regni fines in Neophytorum quorundam ædes clari receperunt, donec aspiret dies tranquillitatis, & inclinentur persecutionis umbræ: nec nulla spes est, nam Dynasta in dies molior aliquam serenitatis lúcem videtur aperire. Eodem tamen in regno tertia sedes est Xinga nomine, quo nondum peculiaris loci Dynasta fauore, communis procella peruenit, huius regni Neophyti vniuersim magnos in tñenda religione animos præ se tulerunt, è quibus omnino quatuor gloriosam in vinculis confessionem hodieque profitentur. In regnis Bugen & Aqui, in quo Ficoxima sita est, antiquam pacem retinet religio Christiana. In Fococu alijsqüe regnis Mori, plus metus quam rei fuit, nam in Neophyto dum multa intentata essent, tentatum re ipsa nihil. Idem Insularum Attiacusa status est, nam tametsi Ximanocamidono earum Regulus, Patres nostros eis cere in animo habebat, tamen suorum consilijs etiam Ethnicorum, ab ea mente deductus est. Idem fere de Omurense Ecclesia, & regnis Gotoo intelligendum volo, nam infra metum ac minas malum fuisse perhibetur: Cum Firandensi cætu, nihil dum moueri audimus. In regno vero Tamba persecutio- nis imbreu depluisse narratur. Hæc nomina- tum tetigisse satis arbitror, peculiarem singula- rum

tum rerum narrationem , litteris annuis refer-
uamus. Nunc ad Tacacu , id est , Arimensem di-
tionem , orationem conuertamus , eiusque lu-
ctuosam faciem contemplemur.

Vbi auditum est Sayemondoum (neque
enim sacro post hac Michaelis nomine dignus
est , qui à fide defecit) nouum Arimensis agri
Dynastam , sublato malis artibus parente , in-
eius locum esse suffectum , & vna cum Heros-
diade illa Imperatoris pronepte aduenire , itine-
risq; comitem rerumq; gerendarum veluti pa-
dagogum assignatum illi Sasioje Nangasauien-
sis agri moderatorem , illum Christiani nomi-
nis hostem acerrimum , facile intellectum est
ab omnibus , atrocem vniuersæ ditioni procel-
lam imminere , satis quippe sciebatur iuuenem
illum dominandi libidine , qua nihil parenti
erat inferior , incitatum , ante annos aliquot Sa-
sioje promisisse , se , si eius opera exturbato pa-
rente , rerum in Arimensi ego potiretur , Pa-
tres nostros omnes è suis finibus exterminatu-
rum , & rem Christianam profligaturum . Er-
go Patres primum se , tum cæteros contra præui-
sa tela , vti minus ferirent accuratè compara-
runt . Et vix acceperat ab Imperatore ius in-
Arimense regnum nouis Dynasta , cum extem-
plo mittit ex vniuerso famulatu selectos qua-
tuor asseclas suos , qui suo nomine Arimensis
agri possessionem adirent .

Ab

Ab his tametsi nihil dum est circa religionem immutatum, clausi sunt tamen dispositis excubijs regni exitus terrā, marique portus omnes, ne quis suo iniussu regni finibus excederet, quam quidem abeundi facultatem, nemini admodum grauatè concedebant, sed cum Patribus nostris ita seuerè agebatur facile ut apparet has excubias in solos Patres esse dispositas, nec dubia fuit coiectura, postea enim compertum fuit nouum apostamat, nostram etiam supellecstile tam sacram quam domesticam dimissis vnicum cum ueste nostris, spe deuorasse, quanquam videatur sententiam mutasse. Consecutus est ille quidem dispositis vigilijs de non efferenda supellecstile quod volebat, sed impeditre non potuit, quin Arimensis Collegij Rector quotidie propè Prouincialem, qui Nangasaquij degebat de omnibus admoneret, licet hoc etiam ipsum non ita facile consequebatur.

Quinto Idus Iunias, in quem diem vigilia Pentecostes incidebat, appulit nouus Dynasta vel potius tyrannus Ximbaram, qui portus in Arimensi ditione numeratur; abest vero Arima tribus non amplius Leucis Lusitanis, & ea ipsa nocte malorum incentor appulit Safioje. Eo in portu simul omnes substiterunt initoq; consilio de vniuersare Christiana euertēda, primum edictum scriptum est in hanc ferē sententiam.

Quoniam

Quoniam summus Iaponiæ Imperator, Christianorum legem Iaponia vniuersa exterminari mandaret, se quoque imposterum iubere, uti subditi omnes sui eam evrent, qui id facere abnuerent, intelligerent se omnino plectendos. liberum porro vnicuiq; fieri quam maximè voluerit è Iaponijs sectis amplecti, earumque sacerdotes ac ministros euocare, quibus ager ad extruenda fana ex publico donaretur. Impium hoc edictum primo alteroque post dictam celebritatem die, in omnibus vicis ac pagis Arimensis agri à primarijs tyranni famulis, quos ad eam rem tres omnino selegerat, est promulgatum, sed ita ut nemini per eos dies vlla vis inferretur, secundo promulgationis die nouis Arimadono, vna cum Safioie, solemni apparatu, Arimam est ingressus. Ex itinere porro impius defertor, hanc dubium quin hortatore Safioie, ob vias aliquot cruces petulanter euertit. Eoque ipso die tres nominati aulæ suæ primores, primus erat Dynasta, Patrus Parentis videlicet & semigermanus, alter erat consobrinus, tertius verò senex quidam, qui iam plures annos vnu fuerat ex Aristensis regni moderatoribus: lis demandauit uti militibus omnibus ac cæterà Nobilium turbâ singulatim accersitis, vna cum ijs, qui stipendia sua metarent, suo nomine mandarent ac suaderent uti ciurato Christo ad patrios ritus reuerterentur. Id agi captum impigre:

pigre: nam in Senioris domum triceni ferè evocabantur, tum singuli ab his inquisitoribus interrogabantur Christumne ex Dynastæ mandato eiurarent? Non deerant aliqui quos pœnatum metus ex animi sententia deturbaret, sed plerique palam asserebant se Principi suo in omnibus ad aras usque parituros, si autem de his violandis ageretur se nec posse nec velle etiam proposita morte parere. hi qui fortiter se gesserant varijs artibus ad mutandam sententiam vrebantur, non solum in Iudicum præsentia, sed submissis familiaribus, qui iam à Christo ad tyrannum indigna permutatione defecerant; quia etiam arte nonnulli, qui iam fortiter restiterant, turpiter deinde sunt expugnati. verum ad extremum fortissimi pugiles, qui sibi ubique constiterunt suere permulti, à quibus iam compatis animis fortunæ vitaque ipsa in Christi causa ponebantur. vbi euulgatum est Nobiles ad Christi confessionem accersiri, certatim in ædem sacram ab omnibus ordinibus concurri ceptum est, ita frequenter, ut nullus Patribus refectio quietue necessariæ locus relinquatur. Cum Neophytis ergo hic ferè ordo per eos dies seruabatur, Matutinis horis omnipotenti Deo litabatur, ijs autem, qui ab iudicibus die condicta fuerant accersiti, sacrosancti huius sacrificij victima in refectionem distribuebatur, ut illius virtute vitam reddere, ne grauarentur

T

ci,

ei, qui suam pro omnium salute prodegerat. Si qui vero angustijs temporis prohibiti , his armis permuniri minimè poterant, ijs in præ-
mium pretiosum hoc munus tradebatur postea
si gloriosam pro Christo confessionem animo
constanter protulissent. Cæteros appositis co-
hortationibus ad profundendum in Christi
causa sanguinem incitabant. Et quia pæni-
tentium numero Patrum paucitas superabatur,
ne cui deessent, hanc rationem inierunt, fratres
nostros adiutores, & alios scholares, rei Chri-
stianæ ex Iaponensis Ecclesiæ instituto admini-
stros, in ædes submittebant singulos accom-
modatius incitatuos, ad mulieres porrò pro-
uectiores destinabant matronas, quæ longa
virtutis exercitatione dignæ Apostolico mini-
sterio videbantur. Sed nihil incitabat arden-
tius quam illorum nobilium, qui iam è pug-
na victores redierant cohortatio, hi enim au-
ctoribus nostris, per ædes cursabant, & sacrum
quo iam ardebat ignem in aliorū animos con-
ijciebant. Salubre visum est hoc institutum
contra impietatis ministros: nam sicut illi for-
tes alioqui pugiles infirmorum colloquijs de-
turbarunt; ita propensius videbatur infirmos
fortasse nonnullos, fortiorum vel colloquijs,
vel exemplis confirmari.

Hactenus cum Neophytis, post etiam cum
Patribus tyrannus decertauit, Ipso enim D. An-
thonij

thonijs Paduani; vel potius Lusitani, die, fortasse
in eam diem sœuire desierat, vt ægrè faceret na-
tioni Lusitanæ (quæ vt alias in oriente permul-
tas, ita hanc expeditionē Iaponicam, cum tanto
fructu cōplexa est) eo inquitam die, cū nouis de-
sertor, cum pellice sua & Satioje cōuiuaretur, du-
os è conuiuio viros nobiles ad Collegium misit,
(quam aptè Herodem ille cū sua Herodiade re-
ferebat!) hos Patribus renunciari hæc fere iubet.
Imperatore suum lege Christiana omnibus in-
terdicere, eam ob causam sibi omnino nō lice-
re, Patres eiusdē legis præcones ac ministros, in
suis terris retinere. Abirēt igitur exemplo quo
vellent, sua secum efferrent, præter ea quæ Ia-
ponico more efferre non licet. Ea conlueftido
est, vt proscripti, ædes suas storeis instratas, ex
more portis ac fenestrīs, & reliqua lignorum
congerie instructas, fisco relinquant. Hoc man-
datum exemplo Collegij Rector, tum Præposi-
to Prouinciali, tum reliquis Patribus, in suas pa-
ræcias tota ea ditione distributis, renunciari iu-
bet, quod vbi euulgatum est, dubitari potest ut-
ros acerbius perculerit nuncius hic, Neophy-
tosne an Pastores, & sanè tristis erat nuncius, tot
annis cultam vineam uno die deserit, in qua ne
palmes quidem unus reperiebatur, qui non in
Christo vite vera, per Baptismum insertus esset.
Ad eum ergo nuncium frequentiores in ædem
nostram concursus fieri cæpti, ijq; ita excreuerūt

ut tyranno quod assolet suspicionem sinistram
mouerint, ædes enim sacra ad pedem collis, in
quo arx est extorta, omnia conspiciunt ob-
ijciebat, ergo immissis excubijs lupi oues à Pa-
storibus arcebant. Neophytorum tamen de-
sideria, militarem in excubando industriam
eludebant: nam consensis, qua minus cre-
debatur parietibus, vel mentito habitu etiam
Nobiles matronæ, in ædem nostram penetra-
bant. hos omnes Patres, quibus poterant sub-
sidijs, sed maximè pœnitentiæ & Eucharistiæ
Sacramentis confirmabant, & niæorem quem
tergere non poterant, mitigabant. Quoniam
verò post mandatum conniuente Arimadono,
nostrî dies aliquot substiterunt, per eos dies ni-
hil aliud diurnis ac prope nocturnis horis om-
nibus faciebant, quam concurrentes Neophy-
tos expiare. quæ porro de Arimensi vrbe dico,
idem de reliquis sedibus dictum volo, Et sanè
tam insignis huius Ecclesiæ virtus intoleranda
procella enituit, ut vniuersæ Iaponiæ exemplo
esse possit in retinenda fide nihilo minus, quam
haætenuis fuerat in amplectenda. Nec enim
solum viri nobiles, aut è militari ordine, qui-
bus fortasse natura plus est animi ad adeunda
pericula; sed ipsi negotiatores & agricolæ, ac
reliquum vulgus primorum exemplum & au-
toritatem præire potius, quam sequi videban-
tur. Ex ijs enim permulti nouo more illustre
sub-

subeundi martyrij sodalitum contrahebant, quod adhibito etiam iureiurando, vel gentis more proprio Chirographum sanguine confirmabant, alijsque modis necessitatem sibi opertendae mortis imponebant, ne quis fortasse hostium aries concepram animo quateret firmitatem.

Accepto Præpositus Provincialis tristi nuncio, reque in deliberationem vocata, Patribus auctor fuit, tametsi Neophytis videretur uti Patres omnes huic primo furori cederent, clam postea ad eos iuuandos reddituri: sibi tamen ac Patribus videri omnino, ne gregem suum Pastores omnes desererent, ac penè proderent, omnino tres aut minimum duos Rector nominaret, qui etiam cum vita periculo se se intra regni fines occultarent. Fecit Collegij Rector, quod iubebatur & communicato cum Neophytis feruentioribus consilio, duos Patres in ipsa vrbe Arimensi reliquit, alterum apud senem quandam ipsius Dynastæ auunculum, & alterum apud alium Neophyrum in suburbanis ædibus occultatum, alium etiam Patrem alio in loco reliquit cum socio adiutore, loco Canaya. nia nomen est. Nunc vero alij duo subsidio submissi sunt, alter in Cuchinotcu, alter in Cadzuca pagis, atque ita Patres omnino quinque tres socij adiutores scholares ministri, in agro Arimensi latent, & rem Christianam quam possunt prudentissime procurant.

T 3

Non

Non arbitrabatur Arimensis Dynasta, cū religionem Christianam ē suis finibus exterminandam suscepit, se tantam in suis ciuibus firmitatem experturum, quam vbi aduertit, satis dubius quid ageret, haerere cœpit. nam hinc eum Safioje vrgebat, mali dux & caput, quē ideo nimis verebatur, quod sciret eum Imperatori esse non mediocriter gratiosum. Illinc intelligebat se, si rem ad exitum persequeretur ditioni suæ exitium allaturum, & erat certum, futuros, qui extrema omnia in Religione tuenda adirentur, neque hi ē primaria solum Nobilitate, sed ex reliquis ordinibus ac plebe vniuersa. Ergo vellet nollet fidei quam extorquere se posse diffidebat, impunè retinendæ permultis Nobilibus fecit facultatem. Negotiatores porro ac opifices, colonosque omnes ab edicto exclusit, liberam illis potestatem faciens Religionis pro arbitratu eligendæ. Ne vero nihil fecisse videretur & iustum Safioje indignationis causam præberet, nonnullos viros nobiles asseclas suos, familias omnino quinque, qui insigniorem coram deputatis quæsitoribus constantiam præ se tulerant, exutos stipendijs ac fortunis omnibus vna cum familia vniuersa exilare iussit, edicto cauens ne quisquam eos reciperet aut foueret. quam illi sententiam non libenter solūm, sed hilariter sunt amplexati, Deo gratulantes suam sortem quam in insigni Dei beneficio reponebāt, deinceps

de ne cuiquam malū accerserent, in siluam sese
ut priores illi quatuordecim ab Imperatore pro-
scripti, cum vniuersa familia receperunt, vbi
eos Neophyti neglectis edicti pœnis, omni
Christianæ pietatis obsequio fouent, nec ipsi so-
lū, sed etiam Patres nostri qui Nangalaqui
morantur vna cum huius Ecclesiæ præfule, in
partem operis pij venire voluerunt: nam ad pe-
cuniarium eleemosinæ nomine subsidium, ve-
stes quoque submiserunt. Nec hic stetit ty-
ranni futor, sed eius mandato tres ex vniuerso
Neophytorum grege vīctimas, martyrij gloria,
eius ministri cohonestarunt. Arimæ vir nobilis
Leo nomine, in Christi causa sanguinem fudit,
quod cum ille iam subodoraretur, verebatur ta-
men, ne si forte improuiso iētu peteretur, ex cō-
suetudine militari ferrū stringeret, & Christia-
næ mansuetudini officeret; sed ut erat compara-
tus, sibi præsens fuit: cum enim in medio vico
sicarius eum inopinantē aggressus fuisset, mox
militare cingulum vnaq; ferrum quo accinctus
erat, abiecit, & mortem pacatissimè suscepit,
quam ardentissimè expetebat. Alij duō Michae-
l ac Matthias in pago Arijæ plexi sunt, quod in
Patrum absentia infantes baptismo eluissent, de-
functos sepelijssent, aliaq; id generis exercitia
peregissent, sed maximè quod auctores fuissent
fodalitij martyrū instituendi, de quo cōmemo-
raui, in eoq; Catalogo primi sua nomina inscrip-
sissent.

T 4

Atque

Atque hic maximè fuit processus institutæ ab Arimensi Dynasta persecutionis, quæ nunc in dies mollior, spem facit pristinæ tranquillitatis breui reddituræ: nam Arimensis Dynasta eo ipso tempore, quo Patres abitum parabant ad Collegij Rectorem misit quendam propinquum suum, qui multa ad se purgandum causaretur, assereretque esse se animo, quo semper fuerat Christiano, sed ne patria hæreditate excideret, hæc se necessario facere: etsi quidem sciret, quanto se scelere adstringeret, sperare se tamen mutatis temporibus omnia cumulate restauraturum. Idem obnunciari iussit Episcopo, & Societatis nostræ superioribus; nec dicitis si dem deesse credimus, satis enim constat, eum non nescire, quod è nostra Societate sacerdotes in Arimensi ditione latitent, quod non dissimulat solùm, verùm etiam facultatem fecit duobus tribus ue rem Christianam, quam occultissimè possent, procurandi, nec in hoc rerum statu nihil est, quod eius vineæ cultores confoletur: nam vñ scribit Episcopus, satis constat nulla ministrorum culpa quicquam innouatum. Præterea tantum Christianæ Religioni ex tanta Neophytorum firmitate per vniuersam Iaponiam splendoris accessit, vt omnino splendens sit, ex hac procella, quod in Ecclesia semper contigit, insignem aliquam serenitatem nascituram. Alia multa erant peculiaria, quæ

anna-



annalibus secururis reseruantur, hæc satis visa sunt, ut ne nesciretur, quo loco res Ecclesiæ Iaponensis versarentur.

Scribitur quoque in altera Epistola, vnde hæc accepi, post scriptas litteras, extinctum è Societate nostra fratrem vnum adiutorem natione Iaponium Gasparem Toi nuncupatum Epilcopi litteræ datæ scribebantur Octobri mense, decimo die, Societatis verò, mensis eiusdem 22. anno salutis nostræ millesimo sexcentesimo duodecimo è portu Nangesaquensi.

Nondum hæc edideram cum Romæ, quo iam itinere diei benignitate confecto perueneram, litteras legi ad Præpositum Generalem, à Prouinciæ Goanæ Præposito Prouinciali Goæ datas Aprili mense, anni 1614. ac itineri terrestri transmissas anno videlicet 1613. Octobri mense scriptas, sibi redditas, his nunciabatur exortam apud Iapones in Neophytes persecutionem malo denuo recruescente acriter vrgeri, siue à decrepito totius Iaponiæ Imperatore siue ab Arimensi Dynasta, fœdissimo Christianæ legis desertore. Et quidem hoc speciatim tangebatur varijs in locis Iaponios Neophytes octo & viginti generose Christum in tormentis professos, vitam glorioso martyrio profudisse; præter alios octo in Arimensi ditione, quos instar nobilissimi Athletæ Laurentij lentis ignibus tostos asserebant; quorum animis ac trium-

T 5 phis

phis accensi ex Arimensibus Neophytis ad vi-
giati millia, sese ad idem tormenti genus in-
Christi causa tolerandum paratos esse prætule-
runt; qua re cognita tyrannus Arimensis terri-
tus, furoris sui cursum inhibuerat. Itaque glo-
riosa quidem triumphis, sed squallida puluere
Iaponehsis Ecclesiæ facies exhibetur; maximè
quod Amacaensis Oneraria, rerum, sine quibus
vita non dicitur, subministratrix in portu sco-
pulo allisa illius anni navigationem fefellit. Et
necessarium in his angustijs subsidium distulit,
spesque multas interruptit. Hæc eo consilio ad-
didi, ut quoniam mala perseverant, lecto-
rum preces non consistant, vti pace
reddita, belli spolia colli-
gantur,

*Ad maiorem Dei Optimi Ma-
ximi gloriam.*

